



Inatsisartunut ilaasortamut, Pele Broberg, Naleraq

Dato: 07-09-2026
Sags nr.: 2024 - 10523

Postboks 260
3900 Nuuk
Tlf. (+299) 34 50 00
E-mail: miin@nanoq.gl
www.naalakkersuisut.gl

1960-ikkunnit ulloq manna tikillugu Naartunaveersaasersuisimanermut suliami inuit pisinnaatitaaffiit tunngasortaannik immikkut ilisimasallit nalunaarusiaannik marluusunik Naalakkersuisunut ilaasortaasimasup Naaja H. Nathanielsenip atuarsinnaasimanera pillugu § 37 naapertorlugu apeqquteqaammut nr. 171-imut akissut.

Pele Broberg-imut

Apequtinnut qujanaq. Apequtitit ataani ataasiakkaarlugit allanneqarput, akissummillu malitseqarlutik.

- 1. Naartunaveersaartitsinermut tunngasumik suliap inuit pisinnaatitaaffiit tunngasortai pillugit nalunaarusiat marluk peer review-mik taaneqartumik misissorneqareerlutik kingulliullugu iluarsiat Naalakkersuisut qanga tigusimavaat, Naalakkersuisunilu ilaasortat sorliit aammalu naalakkersuisoqarfiit sorliit nalunaarusianik atuarsinnaasimappat imaluunniit atuarnissaanik periarfissinneqarsimappat?**

Nalunaarusiat iluarsiat juulip tallimaani aamma juulip 13-iani Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoqarfimmut tunniunneqarput. 21. August 2026 Naalakkersuisut tamarmik nalunaarutit tiguai. Nalunaarut Dalee Sambo Dorrough-imit aamma Miriam Cullen-imit allataq, nutserineq kinguaattoornera pequtaalluni 23. August 2026-mi Naalakkersuisut tiguaat. Taassuma saniatigut Naalakkersuisut Siulittaasuata Naalakkersuisoqarfiani, Nunanut Allanut Naalakkersuisoqarfimmi aamma Peqqissutsimut inunnullu Innarluutilinnut Naalakkersuisoqarfimmi atorfilinnit inuttalerlugu naalakkersuisoqarfiit akimorlugit attaveqarnermut upalungaarsimanermi ilaatinneqarput.

- 2. Naaja H. Nathanielsen nalunaarusiat marluk arlaat siullerpaamik qanga atuarnissaannut periarfissaqalerpa, nalunaarusiat sorliit imaluunniit qanoq ilusillit atuarpai, qanorlu inissisimanermini tamanna piva?**

Naaja H. Nathanielsen Naalakkersuisuunermini naartunaveersaasersuisimanermut suliamut, taamaalillunilu immikkut ilisimasallit misissuinerinut akisussaasutut nalunaarusiat, 2026-mi januaarip 31-ani Naalakkersuisunut tunniunneqartut tigunikuuai.

- 3. Naaja H. Nathanielsen Naalakkersuisuni ilaasortatut tunuareernerata kingorna nalunaarusiat arlaat imaluunniit tamarmik suli atuarnissaannut periarfissaqarsimava imaluunniit pigisimanerpai? Aappiuppat, tamanna inatsisitigut imaluunniit allaffissornikkut sunik tunngaveqarpa?**

Naaja H. Nathanielsen Naalakkersuisuujunnaareernermi kingorna nalunaarusianik taakkuninnga marluunnik atuarnissaminut periarfissaqarsimanersoq Naalakkersuisut ilisimasaqanngillat. Naaja H. Nathanielsen Naalakkersuisutut tunuareernerata kingorna nalunaarusianik taakkuninnga marluusunik atuarnissaanut periarfissinnikuunngilaat.

- 4. Naaja H. Nathanielsen nalunaarusianik atuarnissamut periarfissaqarnissaanut tunngatillugu nipangiussisussaataitanermut, toqqorsivigineqarnerannut, atornerqarnissaannut aammalu tamanut saqqummiussinissamut atatillugu malittarisassat, ilitersuutit imaluunniit aalajangersimasumik piumasaqaatit suut atuuppat imaluunniit atuussimappat?**

Naalakkersuisut sulinerat, paasissutissanillu isumaginninnerat pingaartumik inatsisitigut sinaakkutit uku malillugit malittarisassiuunneqarput: Inatsisartut Naalakkersuisullu pillugit Inatsisartut inatsisaat, Naalakkersuisunut ilaasortat akisussaannerat pillugu Inatsisartut inatsisaat, Pisortat ingerlatsineranni suliaassat suliarineqartarnerat pillugu Inatsisartut inatsisaat aamma Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat.

Naalakkersuisoq tunuarpat pineqartup paasissutissanik takunnissinnaanera, allaffeqarfimmiillu sullinneqarnera unittarput – matumani nalunaarusianik sulit tamanut saqqummiunneqanngitsunik takunnissinnaaneq ilanngullugu.

- 5. Naaja H. Nathanielsen Naalakkersuisuni ilaasortatut tunuareernerata kingorna nalunaarusiat tamanut saqqummiunneqannginneranni paasissutissanik nalunaarusianiittunik tigummiinnarnissaanut, atornissaannut imaluunniit tamanut saqqummiussilluni oqaaseqarfiginissaannut Naalakkersuisut akuersissuteqarfigisimavaat? Aappiuppat, qaanga, kimit aammalu suna tunngavigalugu?**

Nalunaarusianik saqqummiussinissaq sioqqullugu nalunaarusianit paasissutissat tigummiinnarnissaanut, atornissaannut imaluunniit eqqaanissaannut Naalakkersuisut Naaja H. Nathanielsen akuerinikuunngilaat.

- 6. Naalakkersuisut maanna atuuttut aammalu qitiusumik allaffeqarfiup avataaniittut kikkut nalunaarusiat marluk tamanut saqqummiunneqannginneranni tamakkiisumik ilaannakortumilluunniit atuarnissaannut periarfissaqarsimappat, qaangalu sunalu tunngavigalugu periarfissaqalerpat?**

Nutserinermik suliaq annertullunilu pisariusimavoq, taamaattumillu nutsigassat ilaat illup avataani nutserisunit nutsertinneqarlutik. Nutserisut isertuussilluinnarnissaminnik piumasaqarfigineqarlutik suliaassatik suliaarat. Taassuma saniatigut nalunaarusiat nutserneri pitsaassutsikkut naliliiffigineqarnikuupput.

- 7. Naalakkersuisut isumaaat naapertorlugu Naaja H. Nathanielsenip nalunaarusianik atuarnissamut periarfissaqarsimanera aammalu nalunaarusiat imarisaannik tamanut oqaaseqaateqarsimanera Naalakkersuisup 19. marts 2026 nalunaarutigisaanut, tassa nalunaarusiat Naalakkersuisunut, Inatsisartunut innuttaasunullu tamanut tulleriaartumik saqqummiunneqassasut aammalu tamanut saqqummiunneqannginneranni nalunaarusiat imarisaat pillugit oqaaseqaateqarqittoqassanngitsoq pillugu**

**naapertuuttutut isigivaat? Aappiuppat, tamanna qanoq
tunngavilersorneqarpa?**

Nalunaarusiat saqqummiunneqarnissaannut tulleriiariniarneq malinneqarpoq. Naaja H. Nathanielsenip Naalakkersuisutut tunuareernerani Naalakkersuisut nalunaarusiat Naaja H. Nathanielsenimut saqqummiutinngilaat. Tamanut saqqummiussinissaq sioqqullugu nalunaarusiat imarisaat pillugit Naalakkersuisut aamma oqaaseqanngillat.

8. Naalakkersuisut nalunaarusiat marluk ingerlaannaq aammalu kingusinnerpaamik Folketingip taarsiissutit pillugit inatsisip 27. august 2026 naatsorsuutigineqartumik inaarutaasumik suliarinerata sioqqullugu tamanut saqqummiutissavaat? Naamiuppat, taava nalunaarusiat kalaallisut, qallunaatut tuluttullu oqaasertallit pillugit uku paasissutissat qinnuigineqarput: a) maanna inissisimanerat, b) suliasat sorliit sulii naammassineqanngitsut, c) suliasat taakku kimit suliarineqarnersut, d) suliat qaqugu naammassineqarnissaat naatsorsuutigineqarnersoq, aammalu e) tamanut saqqummiussiffissaq qaqugu ilimagineqarnersoq.

Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisup aggustip 21-ani tusagassiorfinnut nalunaarutitigut nalunaarutigaa, nalunaarusiat marluullutik 2026-mi tallimanngornermi aggustip 28-ani kalaallisut, qallunaatut, tuluttullu tamanut saqqummiunneqassasut. Nalunaarusiat marluullutik oqaatsini taakkunani pingasuni tamanut saqqummiunneqarput.

Inussiarnersumik inuulluaqqusillunga


Mariane Paviassen Jensen